

UKA 2023/49: Naalakkersuisut – Inatsisartuni ataatsimiititaliaq suleqatigalugu – Kalaallit Nunaanni Inatsit Tunngaviusussaq pillugu missingiutip, Inatsit Tunngaviusussaq pillugu Isumalioqatigiissitap suliarisaata suliareqqinneqarnissaanik piaartumik qulakkeerinnequllugit inatsisartut aalajangiiffigisassaattut siunnersuut. Suliareqqinermi ilaatigut innuttaasut, ilinniarfeqarfiit soqutigisaqaqatigiillu kattuffii peqataatinneqassapput.

(Inuit Ataqtigiit Inatsisartuni ilaasortaataat)

UKA 2023/74: Inatsit tunngaviusussaq pillugu Isumalioqatigiissitat tunngaviusumik inatsisissamut missingiusiaat pillugu innuttaasut akornanni isummersoqatigiinnissamut periarfissiisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Siumup Inatsisartuni ilaasortaataat)

Akissuteqaat

(Naalagaaffingnornissamut Nunanullu allanut Naalakkersuisoq)

Siullermeerinnineq

Inuit Ataqtigiit Inatsisartuni ilaasortaataat Siumullu Inatsisartuni ilaasortaataat aalajangiiffigisassatut siunnersuutinik marlunnik, Kalaallit Nunaata Inatsit Tunngaviusussamik suliap nanginneqarnissaanut imaqtartunik Naalakkersuisut sinnerlugit qujavunga.

Aallaqqaasiullugu nunatta siunissaa pillugu siammasissumik oqallittoqarnissaa Naalakkersuisut kissaatigimmassuk erseqqissaatigissavara.

Kalaallit Nunaata Inatsit Tunngaviusutigit inissisimanagera ukiut ingerlaneranni allanngorpoq. Kingullermik 2009-mi Kalaallit Nunaanni namminersorneq pillugu inatsit akuerineqarpoq. Kalaallit Nunaanni Inatsit Tunngaviusussaq pillugu isumalioqatigiissitap 2016-mi pilersinneqarneratigit, Kalaallit Nunaata namminiilivinnissaa namminersortunngornissaalu aqqutissiuunneqarpoq. Inatsit Tunngaviusussaq pillugu Isumalioqatigiissitap takorluukkatsinniit sivisunerusumik unammillernarnerusumillu suliaminik ingerlatsivoq, maannali Kalaallit Nunaata namminersortup Inatsit Tunngaviusussaatut missiliummik patajaatsumik, sulili naammassineqanngitsumik peqalerpugut. Suliarli maanga uninngilaq.

Inatsisartunut ilaasortat tamat oqallinneranni aalajangiiffigisassatullu siunnersuutit marluk aqqutigalugit, Inatsit Tunngaviusussaq pillugu Isumalioqatigiissitap missiliutaanik suliaqarnerup nanginneqarnissaanik Inatsisartut piumasaqarnerat nuannaarutigaa.

Maanna innuttaasut akuutinneqarnissaat aalajangeeqataanissaallu pingaaruteqarpoq. Inatsit Tunngaviusussarmi kikkunnut tamanut atuuttussaavoq. Taamaammatt kikkut tamarmik missiliummut isummaminnik anitsinissamut periarfissinneqartariaqarput.

Inatsit Tunngaviusussaq pillugu Isumalioqatigiissitap isumaliutissiissutaata paasiuminartunngorlugu allanneqarnera Naalakkersuisut aallarereerpaat, taamaalilluni sapinngisamik tamani amerlanerpaat oqalliseqataasinnaaqullugit. Suliaq tamanna nunatta Inatsit Tunngaviusussaatut siunnersuutip, innuttaasut tamarmik akornanni oqallinnissamut tunngavissatut pitsaassuseqarnissaa qulakkeerniarlugu suleqatit avataaneersut suleqatigalugit ingerlanneqarpoq.

Inatsit Tunngaviusussaq pillugu Isumalioqatigiissitap isumaliutissiissutaata paasiuminartumik allataq innuttaasut tamarmik tusarniarneqarlutillu akuliutsinneqarnissaannik Naalakkersuisut ilimagisaannut atugassatut innuttaasunut tamanut agguanneqarsinnaassaaq. Inatsit Tunngaviusussaq pillugu Isumalioqatigiissitap innuttaasunik naapitsillutik, nunarput tamaat angallavigalugu siunnersuummik saqqummiussinissaat, taamaalillutillu tamatta siunissarput pillugu innuttaasunik toqqaannartumik oqaloqatiginninnissaat Naalakkersuisut kissaatigisorujussuaat. Tamanna Inatsisartut Naalakkersuisullu akornanni qanimut oqaloqatigiinnikkut ingerlanneqassaaq.

Kalaallit Nunaata Inatsit Tunngaviusussaatut missiliummik suliarinninnermik nangitsitsinissamik siunertaqartumik siunnersuuteqartut siunertaat Naalakkersuisut isumaqatigaat, taamaattoq allannguutissatut siunnersuut ima nipeqartoq Naalakkersuisut saqqummiukkumavaat:

Qanoq iliornikkut Nunatta Inatsit Tunngaviusussaatut missiliut inuiaqatigiinnit peqataaffigineqarnerpaasumik oqallisigineqarsinnaanera pillugu Naalakkersuisut kingusinnerpaamik UPA2024-imi Inatsisinut Ataatsimiitsitaliamut isummerfigisassanngorlugu pilersaarummik saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.